

Wapiyaro' Kareta Isaan Winipaino Ekamanin

Wapiyaro' Kareta Isaan Winipaino esi eke ton asa'ron ku'nin pe: Imenukasa' ennin nan pori'manin pe Papa pokon pe miri awonsi'ki Imu Sises Kurai pokon pe tuko'mansan pe to' e'to' pe, miri awonsi'ki to' panamanin pe ennakan pe enupan nito' namai' seri si to' pokon pe e'nito' ma'tanu'nin. Seri enupan nito' esi apuri wini non eseru wini iri esi tukai', miri pi' si Sises, Papa Mumu, esi'pu poken para iyesi ka'pon pe. Kamoro si ti'sa amu' uya ta epika'tin nito' pe emo'kan nito' pe iyesi uko'man nito' yapai seri non po; miri awonsi'ki to' uya kanan enupan ni'pu epika'tin nito' esi waku pe ri iteseru e'ni uya miri pe para taron kon i'nanka uya ri ikupu pen ta.

Seri nin si enupan nito' esi miri kane tawon pe miri pi' imenukanin uya ekama Sises Kurai kuru ri esi'pu ka'pon pe tukai', miri awonsi'ki ekama iya kuru tanporon kon Sises apurinin nan miri awonsi'ki Papa i'nankanin nan uya ri mari tatonpa kon i'nankato' pe iyesi tukai'.

Iyawon Ekamanin

Ekamanin (1:1-4)

Iweyu miri awonsi'ki ewarupi (1:5—2:29)

Papa munki miri awonsi'ki Makoi munki (3:1-24)

I'napairon miri awonsi'ki ipokena' pen (4:1-6)

Usi'nankan tarawasooi (4:7-21)
Entakanin apurito' (5:1-21)

Uko'man Nito' Maimu

¹ Iyepiya'ti si'kiron, ina neta'pɛ, ina nene'pɛ tenu kon ke, ina nenpitu'pɛ, miri awonsi'ki ina emiyatu na'pitu'pɛ—seri pi' ina usaurokɛ Uko'man Nito' Maimu pi'. ² Uko'man nito' usenpoika'pɛ; ina uya ene'pɛ, miripan ekama ina uya, miri tiwiri ri uko'man nito' pi' ina uya ayauro'ka kon, Ikuipɛnɛ piyawon usenpoika'pɛ ina piya'. ³ Ina nene'pɛ, ina neta'pɛ ekama ina uya ipi'nokon; miri pi' a'samutu yau e'nito' kon pe. Miri awonsi'ki Ikuipɛnɛ miri awonsi'ki Imu, Sises Kurai pokon pe a'samutu yau e'ni'nokon. ⁴ Seri si menuka ina uya mararon pe pɛra pori' pe e'nito' kon pe.*

Iweyu Yau Usarin

⁵ Se main, ina neta'pɛ iwinon ekama ina uya ipi'nokon: Papa esi iweyu pe; ewarupi pɛra kuru ri iyese iyau. ⁶ Iyamutu pe e'ni ta yau e'tane ewarupi yau ri itil'ma, kasi pe ri e'ni, i'napairon yau iko'mamɛi'ma pɛra ri. ⁷ E'tane iweyu yau utin pe iyese yau, iweyu yau iyese na'ne' kasa, isitonpa pe a'samutu yau ri e'ni'nokon, Sises si, Imu manɛ uya ukorɛka kon tanporon makoi apai.†

⁸ Imakooi pɛra usi'tun pe iyese yau, usenku'tin pe ri iyese iwano' wannɛ pe ri, miri awonsi'ki i'napairon pɛra ri iye'tane uyau'nokon. ⁹ Umakooi kon ekamasa' pe iyese yau, ta'pɛ tɛuya awiri

1:1 Isaan 1:1 **1:2** Isaan 1:14 * **1:4** Tɛron ni ton emennɛ'pɛ pe imenukasa' ton uya, mararon pe pɛra pori' pe iwe'to' kon pe ta.

† **1:7** tanporon makoi apai; miri pe pɛra, makoi apai'ne ri.

iyesi miri awonsi'ki waku pe ri upi'nokon iyesi, isentu'ma ri upi'nokon, miri awonsi'ki ukoraka iya 'nokon ni tanporon ipoken para e'nito' apai. ¹⁰ Umakoitan nisa' para iyesi ta'nokon yau, kasi ye' pe ri Papa kupu'nokon miri, imaimu para iyesi uko'man nito' kon yau.

2

Kurai, Upika'tinin Kon

¹ Seri menuka uya seri iyena'nokon, umunki amu' ru'kwi, iye'makoima kon namai'. E'tane inu' ri e'makoimasa' yau, moro man Sises Kurai, Ipokena' ri, uwapu'ti kon pe Ikuipunu auro'kanin.

² Kuri ri uya umakooi kon e'masa' seri* — uri'nokon makooi riken pen, e'tane tanporo pata awiron kon makooi ri niri.

³ I'tu tukai' kuru ri e'ni, apiyontin nito' iyawiri e'ni yau. ⁴ Kuri ri i'tu uya tawon pe esii'ma, apiyontin nito' iyawiri para na'ne' esi miri kasi ye' pe, i'napairon para ri iyesi iyau. ⁵ E'tane inu' ri imaimu awiron esi yau, Papa usi'nunkato'† kuru ri esi miri iyau mararon pe para ri, waku pe kuru ri. Se kasa iyau e'ni tukai' i'tu miri: ⁶ Inu' uya ri Sises yau esi ta a'tai, iyesi'pu kasa ri iye'to' pe iyesi.

⁷ Utonpa ton nu'kwi, emenna' pen ni apiyontin nito' menuka uya seri iyena'nokon, e'tane penaro' ri, iyepiya'ti yau ineporo'pu kon ni. Seri apiyontin nito' esi penaro' ri inetakaa'pu kon. ⁸ E'tane

* **2:2** Kuri ri uya makooi kon e'masa' seri; miri pe para, Kuri ri kuri ri Papa uya kota'man nito' i'ni'panu'nin, umakooi kon mo'kanin.

† **2:5** Papa usi'nunkato'; miri pe para, Papa i'nunkato' iya **2:7** Isaan 13:34

seri emenna' apiyontin nito' menuka uya seri iyena'nokon; miri i'napairon usenpoikasa' Sises yau miri awonsi'ki ayau'nokon niri, apune para ewarupi utin pi' man miri awonsi'ki i'napairon iweyu pe te'sen ne'wei'tika'an.

⁹ Inu' ri iweyu yau esi tai'ma tatonpa ewaruma'tiyai'ne' esi miri ewarupi yau ri seri pona ri. ¹⁰ Inu' ri tatonpa i'nankanin uko'mamu miri iweyu yau, i'ri para iyesi iyau tatonpa uta'mo'ka emapu'tito' iya wini.† ¹¹ E'tane kari ri tatonpa ewaruma'tinin esi miri ewarupi yau, iyau utin pi' iyesi. Tautito' ya' i'tu iya para iyesi, ewarupi uya tenku'ne iku'sa' pi'.

¹² Kareta menuka uya seri iyena'nokon, umunki amu' ru'kwi,
apune para amakooi kon pi' isentu'masa' pi' tесе'awiri.

¹³ Kareta menuka uya seri iyena'nokon, papai pokon,
apune para kari ri iko'mansa' iyepiya'ti'pu si'kiri ri i'tu auya'nokon pi'.

Kareta menuka uya seri iyena'nokon,
moineri'san,
apune para iri entai iwe'sa' kon pi'.

Kareta menuka uya seri iyena'nokon, umunki amu' ru'kwi,
apune para Ikuipanu i'tusa' auya'nokon pi'.

¹⁴ Kareta menuka uya seri iyena'nokon, papai pokon,

† **2:10** i'ri para iyesi iyau tatonpa uta'mo'ka emapu'tito' iya wini; miri pe para, i'ri ri ita'mo'ka emapu'tinin para ri iyesi iyau.

apune p̄ra i'tu auya'nokon pi' kari ri iyepiya'ti
 si'kiron.
 Kareta menuka uya seri iyena'nokon,
 moineri'san,
 apune p̄ra pana' pe iwesi kon pi',
 miri awonsi'ki Papa Maimu esi ayau'nokon
 pi',
 miri awonsi'ki iri entai iwe'sa' kon pi'.

Oru Kusi'nunkatuu

¹⁵ Oru kusi'nunkatuu, miri pe p̄ra i'ri ri oru
 po te'sen. Inu' uya ri oru i'nunka yau, Ikuipanu
 i'nunkato' iya p̄ra iyese miri iyau. ¹⁶ Apune
 p̄ra tanporon oru pon—ka'pon e'to' tarui pe ipi',
 itenu taruipanin, miri awonsi'ki mi pe iye'ku'to'
 timamin ke tesi pi'—seri ton esi miri Ikuipanu
 winon pe p̄ra, e'tane oru winon pe iyese. ¹⁷ Oru,
 miri awonsi'ki iyau'ne na'ne' taruipanin p̄ra
 ri iyena, e'tane kari ri i'se Papa e'to' ku'nin
 uko'mamu miri tiwiri ri.

Panaman Ennakanin Kurai Namai'

¹⁸ Umunki amu' ru'kwi, iweyu u'ma'to' uye'sa'
 man; eta'p̄ra auya'nokon kasa ri Kurai pe itese' en-
 nakanin tuuye'ton tawon, seri pe tu'ke to' uye'sa'
 man. Seri kasa iyese pi' i'tu iweyu u'ma'to' uye'sa'
 tukai'. ¹⁹ Upiyapai'nokon to' uti'p̄ra, apune p̄ra
 utonpa kon amu' pe p̄ra tesi kon pi'. Utonpa
 kon pe to' esi yau, moro to' nesii'no; to' uti'p̄ra uya
 ekama utonpa kon pe p̄ra ri to' esi'p̄ra tukai'.

²⁰ Imiri'nokon man Waku n̄karapaima'san pe,
 miri awonsi'ki tanporo imiri'nokon uya i'napairon
 i'tu. § ²¹ I'napairon i'tu auya'nokon p̄ra iyese pi'

§ 2:20 tanporo i'napairon i'tu auya'nokon, ta t̄aron ni ton
 imenukasa' uya.

imenuka uya 'nokon pen, e'tane i'napairon i'tu auya'nokon pi', kasi pe te'sen uyepu pen miri i'napairon wini. ²² Inu' esi kasi ye' pe? Kari sa'ne Sises esi Kurai pe tukai' i'tunin pe para te'ku'sen. Kari ri esi miri Kurai pe itese' ennakanin pe—Ikupunu miri awonsi'ki Imu i'tunin pe para ne'ku'ai'ne'. ²³ Inu' ri Imu pi' kane tawon esi yau, Ikupunu anannin pe para iyese miri; inu' ri Imu pi' ewai' tawon uya Ikupunu ri mari anamu.

²⁴ Tiwi miri iyepiya'ti pe ineta'pu kon nako'mamui ayau'nokon. Miri kasa iwesi kon yau, Imu miri awonsi'ki Ikupunu yau iwesi kon miri. ²⁵ Seri si uyauro'ka'pu iya 'nokon itato' pe tauya—tiwiri ri uko'man nito'.

²⁶ Seri ton menuka uya seri iyena'nokon, ayano'ma i'se 'nokon te'san esi pi'. ²⁷ Tiwi Waku A'kwaru* ineporo'pu kon nako'mamui ayau'nokon, inu' ri iyenupanin kon i'se para iwesi kon miri. Iya'kwaru uya iyenupasa' kon na'ne' tanporon pi' ri, i'napai ri iyese, enku'tinin pe para —iyenupasa' iya 'nokon na'ne' kasa ri, iyau ri iko'manti'.

Papa Munki Amu'

²⁸ Seri si, umunki amu' ru'kwi, iyau iko'manti'; isenpoika a'tai, enari'mura e'nito' kon pe miri awonsi'ki tipiyi'se para irau e'nito' kon pe iyepu a'tai.

* **2:27** Waku A'kwaru—karapaiman; itekare yau miri pe para karapa apitu iku'to' pe ika'sa' eseru awiri Waku A'kwaru esi moro, miri pe para itarawasooi miri pe para pageman nito' iya esi ta e'kwa pe.

²⁹ Ipokena' pe Sises esi tukai' i'tu auya'nokon yau, i'tu auya'nokon tanporon kon ipoken te'sen ku'nin nan esi imunki pe.

3

¹ Eke pe kuru ri tɔusi'nɔnkato' nonkasa' Ikaipɔnɔ uya upona'nokon, miri pe iyese pi' Papa munki pe ri e'sesa'nito' kon pe iyese! Kamoro pe ri si e'ni! Miri pe iyese pi', orɔ uya i'tun pɔra ri iyese, apɔne pɔra Papa i'tu iya pɔra ri iyese ke. ² Utonpa ton nɔ'kwɔ, Papa munki pe ri si e'ni'nokon, e'tane i'tu pɔra ri mari iyese miri kasa e'nito' oton kon tukai', e'tane isenpoika a'tai,* ikasa e'nito' oton kon i'tu uya'nokon, iye'to' pe ri ene'nokon miri. ³ Tanporon kon seri kasa te'ku'san iyau ekorɔka wakɔ pe, ikasa kuru ri esuken.

⁴ Tanporon kon tɔumakoitan uya Papa uya apiyontin nito' i'kwitɔ miri, apɔne pɔra makoi esi Papa uya apiyontin nito' pɔra ri e'ni pe. ⁵ E'tane i'tu auya'nokon isenpoika'pɔ umakooi kon mo'kase'na, miri awonsi'ki makoi pɔn ni iyau. ⁶ Inɔ' ri iyau nɔko'manyai'ne' e'makoimato' pen ni, e'tane kuri inɔ' ri e'makoiman pi' na'ne' uya ri nin ensa' pɔra iyese miri, miri pe pɔra i'tusa' iya pɔra ri iyese.

⁷ Umunki amɔ' rɔ'kwɔ, inɔ' ri ayano'mati'nin. Kuri ipoken te'sen kupɔ pi' na'ne' esi miri ipokena' pe ri, ipokena' pe iyese na'ne' kasa ri. ⁸ Inɔ' ri makoi kupɔ pi' nɔko'manyai'ne' ri esi miri Makoi mɔre pe, apɔne pɔra Makoi esi tɔmakooikenan pe ri pena ri iyepiya'ti'pɔ si'kiri. Seri wenai kuru si

3:1 Isaan 1:12 * **3:2** isenpoika a'tai; miri pe pɔra, ti'tusen pe iyena a'tai **3:5** Isaan 1:29

Papa Mumu usenpoika'p_u miri Makoi tarawasooi ma'tan_u'se'na. ⁹ In_u' ri Papa wini iyentusa' pe na'ne' e'makoima pen miri miyari ri, ap_une p_ura Papa eseru esi iyau. Ap_une p_ura Papa wini iyentusa' pi', iye'makoima p_ura ri iyesi. ¹⁰ Seri kasa si i'tu miri in_u' yan esi Papa munki am_u' pe tukai', miri awonsi'ki in_u' yan esi Makoi munki am_u' pe tukai': In_u' ri ipoken te'sen kup_u iya p_ura ri na'ne' esi miri Papa mare pe p_ura ri; in_u' ri niri tatonpa i'n_unka iya p_ura na'ne' esi imare pe p_ura.

Itonpa Kon Am_u' I'n_unkat_i'

¹¹ Main, iyepiya'ti si'kiri ineta'p_u kon esi se kasa: Utonpa kon am_u' ti'n_unkai' e'nito' kon pe. ¹² Keen kasa p_ura e'ti', iri pe te'sen iwano', miripan uya takon wini'p_u. I'ri pe iyesi pi' takon wini'p_u iya? Ap_une p_ura iri pe tankup_un_u esi pi', ipokena' pe takon nakup_un_u e'tane. ¹³ Kisewansiukat_u, utonpa ton, or_u uya iyewaruma'ti kon yau. ¹⁴ I'tu'nokon eri'nito' entakasa' uko'man nito' ya', ap_une p_ura utonpa kon i'n_unka pi'. In_u' ri t_usi'n_unkasen pen enkurum_u miri eri'nito' yau ri. ¹⁵ In_u' ri tatonpa ewaruma'tinin esi miri te'wisen pe ri, i'tu auya'nokon te'wisen pe te'sen yau inke uko'man nito' p_ura ri iyesi.

¹⁶ Se kasa usi'n_unkan nito' i'tu miri: Sises Kurai uya t_uko'manto' t_ur_u'p_u uiwano' kon pe. Miri kasa uko'man nito' kon nonkato' pe iyesi miri utonpa kon iwano' pe. ¹⁷ In_u' ri imaminkena' uya tatonpa esi i'ri ri i'se enpi_u yau, e'tane isentu'ma p_ura iyesi ipi', i'ri kasa ken si Papa usi'n_unkato' esi iyau? ¹⁸ Umunki am_u' r_u'kw_i, umaimu kon

ke, unta kon ke riken usi'nankanpai'nokon para man, e'tane tuku'se kuru miri awonsi'ki i'napairon yau kuru. ¹⁹ Seri kasa kuru iyese a'tai, i'tu miri i'napairon pe e'ni, uyewan kon ereuta nin si ipiyau, ²⁰ uyewan kon uya uyeno'ma kon a'tai. Papa esi miri uyewan kon entai, tanporon i'tunin.

²¹ Utonpa ton nu'kwi, uyewan kon uya uyeno'ma kon para iyese yau, enari'mara ri Papa piyau e'ni'nokon ²² i'ri ri ekama'posa' a'tai repa ni iya, apiyo'man nito' iyawiri e'ni pi', tupori'manin kupu pi'. ²³ Seri si seri apiyontin nito' iya: Tumu, Sises Kurai ese' yau apurito' pe, miri awonsi'ki utonpa kon ti'nankai' e'nito' pe uyapiyo'masa' iya 'nokon na'ne' awiri. ²⁴ Kamoro apiyontin nito' iyawiron kon uko'mamu miri iyau, miri awonsi'ki to' yau niri iko'mamu. Seri wini i'tu miri uyau'nokon iyese tukai': I'tu'nokon Iya'kwaru uyena'nokon inturu'pu wini.

4

A'kwaru Ton I'tu

¹ Utonpa ton nu'kwi, tanporon ni a'kwaru amu' kusapuritau, e'tane tanporo ka'pon amu' i'tuti' Papa winon pe pe' to' esi tukai', apune para tu'ke kuru enakanin nan pu'kena' amu' utisa' miri seri non po. ² Se kasa Papa A'kwaru i'tuto' auya'nokon esi miri: Tanporon ka'pon amu' a'kwaru, Sises Kurai uyee'pu ka'pon pe tukai' ekamanin pe na'ne' nan esi miri Papa winon kon pe, ³ e'tane tanporon ka'pon amu' a'kwaru Sises i'tu iya para na'ne' nan esi miri Papa winon kon pe para. Seri esi miri

Kurai pe itese' ennakanin a'kwaru pe, iye'to' oton tukai' ineta'pu kon, miripan uye'ka'sa' man seri non pona.

⁴ Imiri'nokon, umunki amu' ru'kwi, esi Papa winon kon pe, miripan kon entai iyena'pu kon, apune para ayau'nokon na'ne' esi pana' pe pari seri non pon entai. ⁵ Kamoro esi seri non pon kon pe, miripan kon usauroku non winon pe ri, miripan kon maimu eta non uya ri. ⁶ Uri'nokon esi Papa winon kon pe, miripan inu' ri Papa i'tunin esi a'tai, uyeta iya 'nokon miri; e'tane inu' ri Papa winon pen esi a'tai, umaimu kon eta iya pen miri. Seri wini i'tu'nokon miri, nai esi i'napairon A'kwaru* pe, miri awonsi'ki nai esi kasi ye' a'kwaru pe tukai'.

Papa Usi'nunkato' Miri Awonsi'ki Usi'nunkan Nito'

⁷ Utonpa ton nu'kwi, utonpa kon ti'nunkai' e'nipai'nokon, apune para usi'nunkan nito' esi Papa winon pe. Tanporon kon tausi'nunkasan esi a'tai, Papa munki pe to' esi miri, miripan kon uya Papa i'tu. ⁸ Inu' ri tausi'nunkasen pen esi a'tai, Papa i'tunin pe para iyese miri, apune para Papa esi usi'nunkan pe. ⁹ Se kasa Papa uya tausi'nunkato' enpoika'pu miri u'koro'tau'nokon: Tikin nan kuru ri Tumu ennoko'pu iya seri non pona, iporo uko'man nito' kon pe. ¹⁰ Seri si seri usi'nunkan nito': Papa i'nunka'pu uya'nokon pen, e'tane Papa uya ui'nunka'pu kon, miripan uya Tumu ennoko'pu taponkon pe konekanin

* 4:6 A'kwaru, miri pe para a'kwaru

wanni pe tusakorooi apai† umakooi kon tumo'kai'.
 11 Utonpa ton nã'kwĩ, Papa uya ui'nũnkasa' kon pi',
 utonpa kon kanan i'nũnkato' pe iyesei. 12 Inũ' uya
 ri Papa ensa' pũra iyesei; e'tane utonpa kon i'nũnka
 pe iyesei yau, Papa uko'mamũ miri uyau'nokon,
 isi'nũnkato' ena miri uyau'nokon mararon pe
 pũra.

13 Iyau uko'man ni miri awonsi'ki uyau'nokon
 iyesei i'tu'nokon, apũne pũra Ta'kwarũ ke repansi'
 iya. 14 Ene'pũ uya'nokon, miripan ekama
 uya'nokon Ikuipũũ uya Tũmu ennoko'pũ seri
 non pika'tinin pe. 15 Inũ' ri Sises i'tuyai'ne' Papa
 Mu pe esi yau, Papa esi miri iyau, kari ri kanan esi
 Papa yau. 16 I'tu'nokon miri awonsi'ki apuri Papa
 uya ui'nũnkato' kon.

Papa esi usi'nũnkan. Inũ' ri uko'mamũ a'tai
 usi'nũnkan nito' yau, uko'mamũ miri Papa
 yau, miri awonsi'ki Papa niri uko'mamũ iyau.
 17 Usi'nũnkan nito' enasa' wakũ pe mararon pe
 pũra upiyau'nokon, enari'ke' pe e'ni namai' eseru
 aimenka weyu a'tai, apũne pũra ikasa enan nisa'
 pi' seri non po. 18 Enari'ke' pe e'nito' pũra iyesei
 miri usi'nũnkan nito' yau. E'tane wakũ usi'nũnkan
 nito' uya enari'ke' pe e'nito' ainũnpa, apũne pũra
 enari'ke' e'nito' esi ekota'man i'tu wenai. Kari
 ri enari'ke' pe na'ne' ekonekasa' pũra iyesei miri
 wakũ pe usi'nũnkan nito' yau.

19 Usi'nũnka'nokon, apũne pũra wapiya
 ui'nũnkasa' iya 'nokon pi'. 20 Inũ' ri, "Papa i'nũnka
 uya," tai'ma, tutonpa ewaruma'tinin esi yau,

† 4:10 tũpokon pe konekanin wanni pe tusakorooi apai; miri pe
 pũra, tukota'man nito' i'ni'panũ'nin pe 4:12 Isaan 1:18

kasi ye' pe iyesi miri. Inu' ri tatonpa, tunenenu i'nankanin pen uya Papa i'nanka para iyesi tunene'pa pen ni. ²¹ Miripan uya seri si apiyo'man nito' tusa' uyena'nokon: Inu' ri Papa i'nankanin uya tatonpa i'nankato' pe ri mari iyesi, tawon.

5

Papa Mumu Apurito'

¹ Tanporon kon Sises esi Kurai pe tukai' apurinin nan esi miri Papa munki pe. Tanporon kon ikurunu i'nankanin nan esi, imare ri mari i'nankanin nan pe. ² Se kasa i'tu miri Papa munki amu' i'nanka tukai': Papa i'nanka miri awonsi'ki apiyontin nito' ari pi' e'ni a'tai. ³ Seri seri Papa i'nanka eseru: Apiyo'man nito' iyawiri te'se. Apiyo'man nito' esi e'tape'ne' pe para ri, ⁴ apune para Papa munki amu' uya oru wapiya'ka. Seri seri unapurinu kon iwapiya'kanin oru entai iyenasa'. ⁵ Inu' kuri oru entai tenasen? Kuri riken Papa Mu pe Sises esi tukai' apurinin.

⁶ Puse ri kuri ri tuna miri awonsi'ki man wini iye'sa' ru'pa—Sises Kurai. Tuna wini riken iyee'pa pen, e'tane tuna miri awonsi'ki man wini. Miri awonsi'ki Ita'kwaru uya ri ekama, apune para Ita'kwaru esi i'napairon pe. ⁷ Apune para osoruwawon esi ekamanin pe: ⁸ Ita'kwaru, tuna miri awonsi'ki man; miri si osoruwawon esi

isi'kaisa ri iteseru.* ⁹ Ka'pon nekamanu anannin nan uri'nokon, e'tane Papa nekamanu esi eke pe kuru, apune para Papa nekamanu pe iyese, intaru'pu tamu pi'. ¹⁰ Inu' ri Papa Mumu apurinin ewan yau seri tekamasesi esi. Inu' ri Papa apurinin pen uya kasi ye' pe iku'sa' miri, apune para Papa nekama'pu apurisa' iya para iyese tamu pi' isauro'tane. ¹¹ Seri si inekamanu: Papa uya tiwiri uko'man nito' ke repa nisa', seri si uko'man nito' esi imu yau.

¹² Kari imu esa' pe na'ne' esi uko'man nito' esa' pe; kari imu esa' pe para na'ne' esi uko'man nito' esa' pe para.

Iu'matu Pe Usauro'ni

¹³ Seri ton menuka uya seri iyena'nokon imiri'nokon Papa Mumu ese' apurinin nan, i'tu kon pa inke uko'man nito' esa' pe iwesi kon tukai'.

¹⁴ Iye'kupu tato' kuru ri esi upiyau'nokon Papa epoto' iyau: i'ri ri ekama'po pe iyese yau, iteseru yau, uyeta iya 'nokon. ¹⁵ Miri awonsi'ki uyeta iya 'nokon tukai' i'tu yau, unekama'ponu kon ni i'tu, ipi' unekama'po'pu kon ni esa' pe e'ni tukai'.

¹⁶ Inu' uya ri tutonpa uya makoi kupu ene yau uma'tan nito' ya' anin pen, niparemai Papa uya iko'manto' ke irepato' pe. Kamoro makoi narinu ton pen uma'tan nito' ya' pi' ta uya miri. Moro

* **5:8** Seri pe iwa imenukasas' Ra'ten yai Roman amu' napurinu: 7 Apune para osoruwawon esi Epan pon ekamanin; Ikairanu, Main miri awonsi'ki Waku Akwaru, seri ton si osoruwawon esi tiki ni. 8 Miri awonsi'ki osoruwawon esi non po ekamanin pe; Iya'kwaru, tuna miri awonsi'ki man. (Iye'seporo para iyese Kiri' amu' numentuka'pu yau 1500 rawiri.) **5:11** Isaan 3:36

makoi esi miri uma'tan nito' ya' anin. Miri pi' nipa'rema ta uya pen. ¹⁷ Tanporon ipokena' pen kupu esi makoi pe, e'tane moro makoi esi uma'tan nito' ya' anin pen.

¹⁸ I'tu'nokon inu' ri Papa mare pe te'sen esi miyari ri umakoitan pi' te'sen pe pura; kari Papa mare uya enkurunpa waku pe, miri awonsi'ki iri na'pitun pe pura ri. ¹⁹ I'tu'nokon Papa munki amu' pe e'ni'nokon, miri awonsi'ki i'tu'nokon tanporo oru esi iri e'to' itesa' pe. ²⁰ I'tu'nokon ni niri Papa Mumu uyee'pu, miripan uya ito'ka'nu'to' ike ke repan nisa', i'napai ri tesi i'tuto' pe. Miripan kari ri i'napai ri te'sen iyau e'ni—imu ri Sises Kurai yau. I'napairi ri Papa pe miri awonsi'ki tiwiri ri uko'man nito' pe iyesei.

²¹ Umunki amu' ru'kwi, papa tato' ipi' pe ika'sa' kon piyau ke'tau.

Wakɔ Itekare: Emenna' Pe Ekonekan Nito' New Testament in Akawaio (GY:ake:Akawaio)

copyright © 2010 Wycliffe Bible Translators, Inc.

Language: Akawaio

Translation by: Wycliffe Bible Translators, Inc.

Akawaio

ake

Guyana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akawaio

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022

0a50da4e-768d-5472-9dd1-d9747ff5918f